


Հաստատված է

ԳՊՀ գիտական խորհրդի

2017թ. թիվ 10 նիստում

ԳՊՀ ռեկտոր՝ Ռ. Խ. Հակոբյան

«30» սեպտեմբերի 2017թ.



ԳԱՎԱՌԻ ՊԵՏԱԿԱՆ ՀԱՄԱԼՍԱՐԱՆԻ

ԷԹԻԿԱՅԻ ԿԱՆՈՆՆԵՐ

1. Սույն կանոնների նպատակն է սահմանել Գավառի պետական համալսարանում (այսուհետ՝ Համալսարան կամ ԳՊՀ) կիրառման ենթակա էթիկայի նորմերը՝ որպես Համալսարանի գործունեության համար կարևոր բարոյական կողմնորոշիչներ:
2. Էթիկայի կանոնները վերաբերում են Համալսարանի վարչական, պրոֆեսորադասախոսական, ուսումնաօժանդակ անձնակազմերի անդամներին, ուսանողներին (այսուհետ՝ դերակատարներ) ովքեր այդ կանոնները պարտավոր են կիրառել միմյանց հետ հարաբերություններում, ինչպես նաև Համալսարանի ներքին և արտաքին շահառուների հետ առնչություններում:
3. ԳՊՀ-ում գործող էթիկայի կանոնները ներառում են բարոյական սկզբունքներ, արժեքային կողմնորոշիչներ, որոնք նպաստում են Համալսարանի դերակատարների կողմից իրենց գործառույթների պատշաճ իրականացմանը, պարտավորությունների բարեխիղճ կատարմանը, ԳՊՀ-ի նկատմամբ հանրային վստահության ապահովմանը:
4. Համալսարանում կիրառվող էթիկայի սկզբունքներն են.
 - 1) բարեվարքություն,
 - 2) ազնվություն,
 - 3) ճշմարտախոսություն,
 - 4) սոցիալական արդարություն, անաչառություն,
 - 5) ժողովրդավարություն,
 - 6) թափանցիկություն,
 - 7) հաշվետվողականություն,
 - 8) օբյեկտիվություն,
 - 9) փոխադարձ հարգանք,
 - 10) փոխադարձ վստահություն,
 - 11) փոխադարձ ուշադրություն, հոգատարություն,

- 12) նվիրվածություն,
- 13) բարեխղճություն
- 14) պատասխանատվություն:

- 5. Համալսարանում բոլոր դերակատարները պահպանում են բարեվարքության ընդհանուր նորմերը, սույն կանոնները, ինչպես նաև ԳՊՀ ակադեմիական ազնվության հայեցակարգում և հակակոռուպցիոն ռազմավարական ծրագրում սահմանված դրույթները:
- 6. Համալսարանում ընդունված էթիկայի կանոն է ազնվությունը, ըստ որի դերակատարները պետք է խուսափեն անազնիվ վարքագծի ցանկացած դրսևորումից՝ խարդախությունից, ստախոսությունից, խաբեությունից, զողությունից, շորթումից, կաշառքի պահանջից, գրագողությունից, արտագրությունից, ակադեմիական ազնվության սկզբունքի այլ խախտումներից:
- 7. Համալսարանում ցանկացած տիպի հաղորդակցության ընթացքում դերակատարները պահպանում են ճշմարտախոսության սկզբունքները՝ խուսափելով կեղծիքից, ստախոսությունից, փաստերի և իրավիճակների աղավաղումներից:
- 8. Համալսարանում դերակատարների համար կարևոր էթիկական նորմ է սոցիալական արդարության սկզբունքը, բոլոր հարաբերություններում անաչառության պահպանման պահանջը:
- 9. Բոլոր ուսանողները և աշխատակիցները հավասար են օրենքի առջև և հավասարապես պաշտպանվում են օրենքով: Արտոնյալ կարգավիճակ որևէ ուսանողին կամ աշխատակցին վերապահելը, դերակատարների ոչ իրավահավասար փաստական վիճակ ստեղծելը՝ որպես էթիկայի կանոնների կոպիտ խախտում, արգելվում է:
- 10. Համալսարանի դերակատարները գործում են ժողովրդավարության կանոններով, յուրաքանչյուրի ազատ խոսքը և կարծիքը հարգելու սկզբունքով:
- 11. Համալսարանում բոլոր գործընթացներն իրականացվում են թափանցիկության սկզբունքով՝ որպես օրինական և ժողովրդավարական գործունեության պարտադիր պայման:
- 12. ԳՊՀ-ում գործում են հաշվետվողականության կառուցակարգեր, որոնց միջոցով ապահովվում է Համալսարանի գործունեության մշտադիտարկումը, արդյունքների վերլուծությունը, ուժեղ և թույլ կողմերի վերհանումը, վերլուծությունների կատարումը և բարելավումների իրականացումը:
- 13. Համալսարանում իրականացվող բոլոր գործընթացները կանոնակարգված են համապատասխան իրավական ակտերով: ԳՊՀ ներքին իրավական ակտերը հրապարակված են և շահառուներին հասանելի՝ կամային և անկանխատեսելի

վարքագծի դրսևորումներից խուսափելու, սուբյեկտիվ որոշումների կայացումը կանխելու նպատակով:

14. Համալսարանում ընդունված են պաշտոնների անձնագրեր՝ համապատասխան գործառույթների նկարագրությամբ: Դրանք հրապարակված են և շահառուներին հասանելի՝ գործառույթների կրկնությունները բացառելու, պարտականություններից խուսափում թույլ չտալու, պաշտոնական դիրքի չարաշահումները և լիազորությունների վերազանցումները կանխելու նպատակով:
15. ԳՊՀ ուսանողների գիտելիքները դասախոսների կողմից գնահատվում են օբյեկտիվության սկզբունքով՝ որպես սոցիալական արդարության ապահովման կարևոր պայման:
16. Համալսարանի բոլոր դերակատարներն առաջնորդվում են փոխադարձ հարգանքի կանոնով՝ գերծ մնալով որևէ մեկի նկատմամբ սպառնալիք, թշնամանք, վիրավորանք դրսևորելուց: Այն ներառում է հարգանքը միմյանց հայացքների, գաղափարների, դիրքորոշումների, ֆիզիկական և հոգեբանական անձեռնմխելության և այլ արժեքների նկատմամբ:
17. Համալսարանում դերակատարները պահպանում են փոխադարձ վստահության կանոնը՝ որպես արդյունավետ համագործակցության անհրաժեշտ պայման, աշխատանքի հաջողության գրավական:
18. Համալսարանի դերակատարները պահպանում են փոխադարձ ուշադրության և հոգատարության կանոնները՝ որպես առողջ բարոյահոգեբանական մթնոլորտի և արդյունավետ թիմային աշխատանքի պարտադիր պայման:
19. ԳՊՀ բոլոր դերակատարները պարտավոր են միմյանց նկատմամբ վարվել ազնվորեն և անաչառ կերպով, առանց կողմնակալության և վարքի անազնիվ դրսևորումների ապահովել ներգրավվածություն ընդհանուր գործում:
20. ԳՊՀ-ում կարևորվում են դերակատարների բարեխղճությունը և նվիրվածությունը գործին, ազնիվ, օբյեկտիվ և կոռուպցիայից գերծ առաջնորդությունն ու ակտիվ մասնակցությունը ԳՊՀ խնդիրների լուծմանը:
21. Համալսարանի բոլոր դերակատարները պատասխանատվություն են կրում միմյանց, արտաքին շահառուների և հանրության առջև՝ իրենց գործառույթները պատշաճ կատարելու համար:
22. Համալսարանի բոլոր դերակատարները պարտավոր են դրսևորել բարոյական վարվելակերպ՝ միմյանց նկատմամբ վերաբերելով առանց խտրականության՝ կապված անձանց սոցիալական վիճակի, ծագման, գույքային դրության, սեռի, քաղաքական կամ այլ հայացքների, հաշմանդամության, դավանանքի և այլ հանգամանքների հետ:
23. Համալսարանի դերակատարները պարտավորվում են ձեռնպահ մնալ որևէ հանձնարարություն և խնդրանք կատարելուց, որոնք չեն բխում օրենքից, Համալսարանի կանոնադրությունից և դեմ են ԳՊՀ շահին:

24. Համալսարանի որևէ մարմնում հարց քննարկելիս, որը վերաբերում է ԳՊՀ աշխատակազմի անդամների անձնական շահին կամ նրա մերձավոր ազգականի շահին, տվյալ անդամը պարտավոր է հրաժարվել հարցի քննարկմանը մասնակցելուց:
25. Համալսարանի դերակատարներն իրավունք չունեն պահանջել կամ ընդունել կաշառք, կամ նյութական ծառայություն, քաղել որևէ անձնական օգուտ՝ իրենց ծառայողական պարտականությունների կատարման կամ այդ պարտականությունների կատարումից ձեռնպահ մնալու դիմաց:
26. Համալսարանի դերակատարները պարտավոր են անմիջապես հայտնել ԳՊՀ ռեկտորին կամ համապատասխան մարմիններին կաշառք առաջարկելու ցանկացած փորձի մասին:
27. ԳՊՀ ֆինանսական կառավարումը, գնման և այլ տնտեսական գործընթացներն իրականացվում են արդարության, ազնվության, թափանցիկության սկզբունքներով:
28. Համալսարանի դերակատարները պարտավոր են խնայողաբար վերաբերել ԳՊՀ գույքին, նյութական ռեսուրսներին և դրանք չօգտագործել անձնական նպատակների կամ շահ ստանալու համար:
29. Համալսարանի էթիկայի կանոնները, ԳՊՀ ակադեմիական ազնվության հայեցակարգի պահանջները և ԳՊՀ հակակոռուպցիոն ռազմավարական ծրագրի դրույթները խախտած անձինք սահմանված կարգով ենթարկվում են կարգապահական և վարչական պատասխանատվության:
30. Էթիկայի կանոնների խախտման հետ կապված գործերը քննում է Համալսարանի ակադեմիական անազնվության դեպքերը քննող հանձնաժողովը՝ ԳՊՀ ակադեմիական ազնվության հայեցակարգում սահմանված կարգով: